

**BOSNA I HERCEGOVINA**  
**Federacija Bosne i Hercegovine**  
**UNSKO SANSKI KANTON**  
**OPĆINA BOSANSKA KRUPA**



# **SLUŽBENI GLASNIK**

## **Općina Bosanska Krupa**

<b>Godina XXXIII – Broj 3.</b>	<b>07. april 2020. god.</b> <b>Bosanska Krupa</b>	<b>Izdaje se na</b> <b>bosanskom jeziku</b>
--------------------------------	--	--

# Sadržaj

3/20.

R/B.	NAZIV AKTA	Br.str.
1.	<i>Poslovnik o dopuni Poslovnika o radu Općinskog vijeća Bosanska Krupa</i>	461.
2.	<i>Pravilnik o načinu utroška sredstva za poticaj primarnoj poljoprivrednoj proizvodnji na području općine Bosanska Krupa</i>	461.
	<i>SVI ZAKLJUČCI</i>	463.

Na osnovu člana 21. stav 1. tačka lj) Zakona o lokalnoj samoupravi Unsko-sanskog kantona («Službeni glasnik Unsko-sanskog kantona», broj: 8/11) i člana 28. stav 1. alineja 17. Statuta Općine Bosanska Krupa- prečišćen tekst 1 ("Službeni glasnik Općine Bosanska Krupa", broj:10/17),na prijedlog Klubova ASDA, SDP i DF, Općinsko Vijeće na drugoj vanrednoj sjednici održanoj dana 06.04.2020. godine, donosi:

## **POSLOVNIK O DOPUNI POSLOVNIKA O RADU OPĆINSKOG VIJEĆA BOSANSKA KRUPA**

### **Član 1.**

Ovim Poslovnikom vrši se dopuna Poslovnika o radu Općinskog vijeća Bosanska Krupa ("Službeni glasnik općine Bosanska Krupa" broj:8/18.) u daljem tekstu :Poslovnik.

### **Član 2.**

U članu 60. stav 4. Poslovnika se dopunjuje i glasi:

Vanredne sjednice Općinskog vijeća mogu se zakazati i održavati putem telefona, elektronski ili na drugi adekvatan način dok traje stanje nesreće u Općini Bosanska Krupa, a odluku o održavanju takve sjednice će donijeti Kolegij Općinskog vijeća.

Glasanje se vrši elektronski ili putem telefona riječima „za“, „protiv“ ili „suzdržan.“

Nakon obavljanog glasanja na način kako je to propisano u ovom stavu, predsjedavajući izvještava sve vijećnike o rezultatima glasanja.“

### **Član 3.**

Ovaj Poslovnik stupa na snagu danom objavljivanja u „Službenom glasniku Općine Bosanska Krupa“.

**Broj:** 01-02-85-1-1/20  
**Dana:** 06.04.2020.godine

**PREDSJEDAJUĆA  
OPĆINSKOG VIJEĆA**  
*Elvira Mehić s.r.*

\*\*\*\*\*

Na osnovu člana 115. Odluke o izvršavanju Budžeta Općine Bosanska Krupa za 2020.godinu („Službeni glasnik Općine Bosanska Krupa“, broj: 10/19, 1/20, 2/20), a u vezi Odluke o proglašenju stanja prirodne nesreće uzrokovano pojavom korona virusom (COVID 19) na području općine Bosanska Krupa broj:06-40-21-12/20 od 17.3.2020. godine, na prijedlog Općinskog načelnika Općinsko vijeće općine Bosanska Krupa na drugoj vanrednoj sjednici održanoj dana 06.04.2020. godine, donosi:

## **PRAVILNIK o načinu utroška sredstva za poticaj primarnoj poljoprivrednoj proizvodnji na području općine Bosanska Krupa**

### **Član 1.**

Ovim Pravilnikom uređuje se način utroška sredstva za poticaj primarnoj poljoprivrednoj proizvodnji na području općine Bosanska Krupa (u daljem tekstu: Pravilnik).

### **Član 2.**

Poticaj poljoprivrednoj proizvodnji na području općine Bosanska Krupa se ogleda kroz subvencioniranje primarne poljoprivredne proizvodnje - repromaterijala za redovnu i dodatnu sjetvu kukuruza, krompira i graha u ukupnom iznosu do 300.000,00 KM.

### **Član 3.**

Pravo na subvencioniranje repromaterijala za redovnu i dodatnu sjetvu kukuruza, krompira i graha imaju sva pravna i fizička lica (u daljem tekstu: poljoprivredni proizvođači) koja su upisana u Registar poljoprivrednih gazdinstava.

Pravo na subvencioniranje repromaterijala za redovnu i dodatnu sjetvu kukuruza, krompira i graha osvaruju i poljoprivredni proizvođači koji nisu upisani u Registar poljoprivrednih gazdinstava uz obavezu da se isti upišu u Registar u skladu sa uputama Službe za obrt, poljoprivredu i poduzetništvo (u daljem tekstu: nadležna Služba).

### **Član 4.**

Sredstva za subvencioniranje primarne poljoprivredne proizvodnje - repromaterijala za redovnu i dodatnu sjetvu kukuruza, krompira i graha u iznosu iz člana 2. ovog Pravilnika utrošiti će se za:

1. Subvencioniranje troškova sjetve redovnih i dodatnih površina kukuruza (sjeme, mineralno đubrivo, zaštitna sredstva),
2. Subvencioniranje troškova sjetve redovnih i dodatnih površina krompira,
3. Subvencioniranje troškova sjetve redovnih i dodatnih površina graha.

#### Član 5.

Pod dodatnim sjetvenim površinama podrazumijevaju se površine koje čine razliku sjetvenih površina u odnosu na sjetvene površine za vlastite potrebe gazdinstva koje se bavi poljoprivrednom proizvodnjom, kao i površine gazdinstva koje se ne bavi poljoprivrednom proizvodnjom, a ima uslove za proizvodnju.

Minimalne dodatne i redovne sjetvene površine po jednom poljoprivrednom proizvođaču za kukuruz je 0,3 ha, a maksimalne sjetvene površine po jednom poljoprivrednom proizvođaču za kukuruz je 1 ha.

Dodatne i redovne sjetvene površine po jednom poljoprivrednom proizvođaču za grah iznosi do 0,05 ha i za krompir iznosi do 0,05 ha.

Iznos sredstava za subvencioniranje redovnih i dodatnih sjetvenih površina kukuruza, graha i krompira obračunat će se na osnovu prijavljene redovne i dodatne sjetvene površine, normativa sjetve i tržišnih cijena kako slijedi:

- Kukuruz (75000 kl.zrna/ha, 250 kg NPK/ha i zaštitno sredstvo potrebno za odobrenu količinu) ..... do 510 KM/ha
- Grah (70 kg sjemena/ha)..... do 1.050,00 KM/ha
- Krompir (2.500 kg sjemena/ha)..... do 4.400,00 KM/ha.

#### Član 6.

Pravo na subvencioniranje troškova repromaterijala za sjetvu redovnih i dodatnih površina ostvaruju poljoprivredni proizvođači sa područja općine Bosanska Krupa, koji su u vremenskom periodu od 24.3.2020. godine do 31.3.2020. godine telefonskim putem prijavili nadležnoj Službi da će zasijati redovne i dodatne površine kukuruza, graha i krompira.

#### Član 7.

Poljoprivredni proizvođači su osim uvjeta iz člana 6. ovog Pravilnika da bi ostvarili pravo na subvencioniranje dužni su:

- podnijeti zahtjev za subvencioniranje troškova repromaterijala na propisanom obrascu,
- potpisati izjavu o prihvatanju uslova radi ostvarivanja prava na subvencioniranje troškova repromaterijala na propisanom obrascu.
- dostaviti kopiju aktivnog računa banke i
- kopija lične karte

Nadležna služba će sačiniti listu korisnika koji su ostvarili pravo na subvenciju troškova repromaterijala i isti će se objaviti na web stranici Općine [www.opcinabosanskakrupa.ba](http://www.opcinabosanskakrupa.ba).

#### Član 8.

Poljoprivredni proizvođači će biti u obavezi kupiti repromaterijal za sjetvu prijavljenih redovnih i dodatnih površina.

Nakon obavljene sjetve službenici nadležne Službe će obići sve poljoprivredne proizvođače sa kojima je zaključen ugovor iz člana 9. ovog Pravilnika, na licu mjesta sačiniti zapisnik o zasijanim količinama na osnovu ugovora iz člana 9. ovog Pravilnika. Po izvršenom obilasku sačiniti će se izvještaj.

#### Član 9.

Sa poljoprivrednim proizvođačima koji su ostvarili pravo na subvencioniranje u skladu sa ovim Pravilnikom Općinski načelnik će zaključiti ugovor kojim će se urediti prava i obaveze ugovornih strana.

#### Član 10.

Poljoprivredni proizvođači sa kojima se zaključi ugovor iz člana 9. ovog Pravilnika dužni su u roku od dva dana od dana kupovine repromaterijala/mineralnog đubriva i zaštitnih sredstava u poljoprivrednim apotekama dostaviti dokaz o izvršenoj kupovini (fiskalni račun sa otpremnicom izdat nakon zaključenja ugovora iz člana 9. ovog Pravilnika).

Ukoliko neki od poljoprivrednih proizvođača nakon objave liste korisnika koji su ostvarili pravo na subvenciju, a prije potpisa ugovora iz člana 9. ovog Pravilnika, izvrši nabavku repromaterijala, istom će se taj fiskalni račun prihvatiti kao dokaz o izvršenoj kupovini.

#### Član 11.

Ukoliko ostane neutrošenih sredstava iz člana 2. ovog Pravilnika nadležna služba će ponovno objaviti poziv poljoprivrednim proizvođačima za iskazivanje zainteresovanosti za sjetvu redovnih/dodatnih površina, te provesti proceduru u skladu sa odredbama ovog Pravilnika.

#### Član 12.

Poljoprivredni proizvođači koji su posijali dodatne sjetvene površine su dužni u slučaju potrebe stanovništva općine Bosanska Krupa izazvanih vanrednim situacijama, elementarnim nepogodama, prirodnim i drugim nesrećama i katastrofama dio ostvarenih prinosa otkupiti uz naknadu Općini Bosanska Krupa kako bi se isti dodijelili stanovništvu općine Bosanska Krupa za koje se od strane JU „Centra za socijalni rad“ Bosanska Krupa ocijeni da je u stanju potrebe.

#### Član 13.

U zavisnosti od dalje epidemiološke situacije, naredbi i preporuka štabova civilne zaštite svih nivoa vlasti postupak i procedure definisane ovim Pravilnikom, mogu se izmijeniti od strane općinskog načelnika, a na prijedlog nadležne Službe.

#### Član 14.

Obavezuje se Služba za finansije da u skladu sa ovim Pravilnikom izradi izmjene i dopune Budžeta Općine Bosanska Krupa za 2020. godinu.

#### Član 15.

Ovaj Pravilnik stupa na snagu danom objave u „Službenom glasniku Općine Bosanska Krupa“.

Broj: 01-02-85-2-1/20  
Dana: 06.04.2020.godine

**PREDSJEDAVALA  
OPĆINSKOG VIJEĆA**  
*Elvira Mehić s.r.*

\*\*\*\*\*

Na osnovu člana 28. Statuta općine Bosanska Krupa- prečišćen tekst 1 («Službeni glasnik Općine Bosanska Krupa» broj: 10/17) i člana 92.tačka 7. Poslovnika o radu Općinskog vijeća («Službeni glasnik općine Bosanska Krupa», broj: 8/18.) Općinsko vijeće, na prijedlog Klubova vijećnika A SDA, SDP i DF Općinskog vijeća Općine Bosanska Krupa, **razmatralo je Prijedlog Poslovnika o dopuni Poslovnika o radu Općinskog vijeća Bosanska Krupa** i na drugoj vanrednoj sjednici održanoj dana 06.04.2020. godine, donosi

#### Z A K L J U Č A K

**Prijedlog Poslovnika o dopuni Poslovnika o radu Općinskog vijeća Bosanska Krupa** usvaja se s tim da se u članu 2.stav 1.mijenja i glasi:

„Vanredne sjednice Općinskog vijeća mogu se zakazati i održavati putem telefona, elektronski ili na drugi adekvatan način dok traje stanje nesreće u Općini Bosanska Krupa, a odluku o održavanju takve sjednice će donijeti Kolegij Općinskog vijeća.“

Stav 2.i 3.člana 2.ostaju nepromijenjeni.

Broj: 01-02-85-1/20  
Dana: 06.04.2020.godine

**PREDSJEDAVALA  
OPĆINSKOG VIJEĆA**  
*Elvira Mehić s.r.*

\*\*\*\*\*

Na osnovu člana 28. Statuta općine Bosanska Krupa- prečišćen tekst 1 («Službeni glasnik Općine Bosanska Krupa» broj: 10/17) i člana 92.tačka 7. Poslovnika o radu Općinskog vijeća («Službeni glasnik općine Bosanska Krupa», broj: 8/18.) Općinsko vijeće, na prijedlog Općinskog načelnika općine Bosanska Krupa, **razmatralo je Prijedlog Pravilnika o načinu utroška sredstva za poticaj primarnoj poljoprivrednoj proizvodnji na području općine Bosanska Krupa** i na drugoj vanrednoj sjednici održanoj dana 06.04.2020. godine, donosi

#### Z A K L J U Č A K

**Prijedlog Pravilnika o načinu utroška sredstva za poticaj primarnoj poljoprivrednoj proizvodnji na području općine Bosanska Krupa** usvaja se uz slijedeće izmjene i to:

- U članu 7. dodaje se alineja 4.koja glasi:  
„- **kopija lične karte**“
- U članu 8.stav 1.iza riječi:“obavezi”riječ:“preuzeti” se mijenja i glasi:“**kupiti**“
- U članu 12.stav 1.iza riječi:“prinosa”riječ:“ustupiti” se mijenja i glasi:“**otkupiti**“

Broj: 01-02-85-2/20  
Dana: 06.04.2020.godine

**PREDSJEDAVALA  
OPĆINSKOG VIJEĆA**  
*Elvira Mehić s.r.*

\*\*\*\*\*